

Lupo Manarie al fâs une partide di discors



Forsit no lu savêš, ma un dai amîš plui granc di Lupo Manarie al è Cane Dell'Uva. Cane e Lupo si cognossin di agnorums e forsit no savêš che di spes si cjatin a fâ une partide di discors. E forsit no savêš che par fâ une partide a coventin lis cjartis di discors, che Lupo Manarie al puarte simpri cun se. Forsit no savêš, che lis cjartis dal discors a son... tropis sono... savêso? E ma no savêš propit nuie eh! Cent! Lis cjartis dal discors a son cussì tantis, e difati cuant che Cane e Lupo a zuin, stant che bisugne dividilis miezis par om, no spiete, no par om, miezis par Cane e chês altris par Lupo. Insome... tu ju viodis cu lis cjartis dapardut: tes çatis, tes orelis, in bocje, tal sachetin, su la ponte dal nâš... Insome, un zûc tal zûc, chel di tignî sù il discors.

La partide e scomence cuntun dai doi che al dîš une frase, une robe che i ven tal cjâf, e di li, svelts, une cjarte daûr chê altre, e meti inpins il discors, come se al fos il domino, cu la difference che un al pues ancje cjoli une cjarte za zuiade e lâ indevant cun chê. Cui chel al piert il fil, o parcè che nol zuie, o al zuie une cjarte che no si confâš, al à pierdût la partide. Ve chi, par esempi, une partide.

Lupo Manarie al à scomençât disint: *A lis razis ur plâs la brovade cul muset!*

- Mangjâ e muri!

- *No ûtu?*

- Alc al è alc, nuie al è nuie,,,

- *Pluitost che nuie, al miôr pluitost*

- No ûtu?

- *Ben, o resti...*

- Ogni mêš si fâš la lune, ogni dì si impare une!

- *Po si sa po!*

- Po no no!

- *Âstu finît di menâ la viole?*

- Tô agne!

- *Can dal ûe!* - ... .. Ve li, che Cane dell'Uva, a chê cjarte, nol saveve ce rispuindi, al veve cjalât tes trê cjartis che al veve suntune orele (Rangjiti - Ce panole! - Pôc si spint e pôc si gjolt) in chê che al veve sul nâš (Va planc che al è dut un veri!) e intune che al tignive sù cu la code (Dal ridi al ven il vaî) e une altre che al veve tes çâtis daûr (Nol è mai un mâl che nol

sedi ancje un ben). Nol jere stât avonde svelto e al veve pierdude la partide! Tu vevis di zuiâ “Ce vitis” lu veve coionât Lupo Manarie, o pûr cjapâ sù di gnûf “Ben, o resti”. Cane dell’Uva, che no si inrabiave mai, al veve tasût, ma al veve zuiade in rispueste un biel “Cuietiti”, cussì, fûr dal discors.

Lupo Manarie al veve rugnât di ridi e al veve segnât il ragjo vinçût.

«Tocje a ti scomençâ la partide», al veve dite. E Cane dell’Uva al veve pensât un moment e pôc par dispjet, un pôc par ridi, al veve tacât cussì: - Bisugne uçâ la manarie par taiâ une fete di salam fresc!

E cumò vait indevant voaltris, tal puest di Lupo Manarie, che al è lât un moment a uçâ la manarie.

***di Rafaêl Serafin***

***Dissen dai Piçui Aiutants di Contecurte***

***Ricart e Jacum***

***#1014***